

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U TEŠNJU
Broj: 39 0 K 076363 25 K
Tešanj, 19.03.2026. godine

U IME FEDERACIJE BIH!

Općinski sud u Tešnju, po sudiji Besimi Ajanović, uz učešće zapisničara Hadžan Ninela, u krivičnom predmetu protiv optuženog F. E., Ž. P. broj . J., općina Tešanj, po optužnici Kantonalnog tužilaštva ZE-DO kantona broj T04 0 KT ... 24 od 07.02.2025.godine, zbog krivičnog djela „Posjedovanje i omogućavanje uživanja opojnih droga“ iz člana 239. stav 3. KZ FBiH, nakon održanog glavnog i javnog pretresa dana 04.03.2026. godine u prisutnosti Kantonalnog tužioca Kadrić Jasmin i optuženog F. E. lično donio je i javno objavio u prisustvu KT Zenica i optuženog, dana 04.03.2026.godine, sljedeću:

P R E S U D U

OPTUŽENI: F. E., sin V. rođene F., rođen ... godine u Tešnju, gdje je i nastanjen, u ulici Ž. p. broj ., u mjestu J., po narodnosti Bošnjak, državljanin BiH, JMB: ..., pismen, sa završenom SSS, po zanimanju stolar, zaposlen, neoženjen, srednjeg imovnog stanja, osuđivan presudama Općinskog suda u Tešnju za krivična djela iz člana 239. stav 3. KZ F BiH, člana 287. stav 1. u vezi sa članom 31. KZ F BiH i člana 286. stav 2. u vezi sa stavom 1. KZ F BiH.

K R I V I J E

što je,

dana 09.09.2023.godine, na području općine Tešanj, suprotno članu 4. stav 2. i 3. i članu 19. Zakona o sprečavanju i suzbijanju zloupotrebe opojnih droga, iako je bio svjestan da je posjedovanje opojne droge zakonom zabranjeno, to je i htio, pa je neovlašteno posjedovao jedan bijeli pvc paketić sa sadržajem bijelo žute praškaste materije neto mase 0,183 grama, crnu pvc kutijicu sa pvc poklopcem u kojoj se nalazila prozirna pvc vrećica sa sadržajem bijelo žute praškaste materije neto mase 0,203 grama i komadić pvc vrećice i papirni paketić sa vidljivim tragovima bijelo žute praškaste materije, koju materiju je dobrovoljno predao ovlaštenim službenim licima PS Tešanj prilikom legitimacije u unutrašnjosti zgrade „Has komerc“ u ulici B. K., u mjestu J., te je vještačenjem utvrđeno da oduzeta materija sadrži psihoaktivnu komponentu „amfetamin“ koja opojna droga je pod rednim brojem 1, Liste opojnih droga iz Tabele 2 Liste psihotropnih tvari „Zabranjene tvari i biljke“, proglašena opojnom,

dakle, neovlašteno posjedovao opojnu drogu,

čime je počinio krivično djelo „Posjedovanje i omogućavanje uživanja opojnih droga“ iz člana 239. stav 3. KZ F BiH, pa se na osnovu istih Zakonskih odredaba i uz primjenu od člana 43. i člana 49. KZ FBiH

OSUĐUJE

Na kaznu zatvora u trajanju od 3 mjeseca

U smislu odredbe 199. ZKP FBiH, optuženi se obavezuje da na ime troškova krivičnog postupka-paušala plati iznos od 30,00 KM, optuženi je dužan platiti u roku od 30 dana od dana pravosnažnosti presude.

Na osnovu odredaba člana 239 stav 4 KZ F BiH, od optuženog F. E. oduzima se ispitivani materijal neto težine 0,154 grama i 0,177 grama grama, a koji se nalazi deponovan u PS Tešanj i isti se ima uništiti.

O b r a z l o ž e n j e

Kantonalno tužilaštvo ZE-DO Kantona Zenica optužnicom broj: T04 0 KT ... 24 od 07.02.2025.godine, optužilo je F. E., Ž. P. broj . Jelah, općina Tešanj, zbog krivičnog djela „Posjedovanje i omogućavanje uživanja opojnih droga“ iz člana 239. stav 3. KZ FBiH, na način, vrijeme i mjesto kako je to opisano u dispozitivu navedene optužnice.

Sudija za prethodno saslušanje ovog suda je predmetnu optužnicu potvrdio dana 11.02.2025.godine i zakazao ročište radi izjašnjenja o krivnji.

Na ročištu koje je održano dana 12.03.2025. godine, optuženi F. E. je porekao krivnju po navedenoj optužnici, te je spis proslijeđen postupajućem sudiji radi zakazivanja glavnog pretresa.

Na glavnom pretresu održanom dana 04.03.2026.godine Kantonalni tužilac je pročitao optužnicu te izjavio da u cijelosti ostaje kod svih prijedloga dokaza kako subjektivnih tako i dokaza objektivne prirode koji su navedeni u optužnici.

Optuženi je u uvodnom izlaganju izjavio da je priznaje krivnju za djelo koje mu se optužnicom stavlja na teret.

Priznanje optuženog je potpuno i u skladu sa provedenim dokazima na glavnom pretresu odnosno dokazima koji su uloženi od strane Kantonalnog tužioca radi utvrđivanja da li postoji dovoljno dokaza o krivnji optuženog a to su: Zapisnik o uviđaju PS Tešanj broj: ... od 07.09.2023. godine, Potvrdu o privremenom oduzimanju predmeta PS Tešanj broj: ... od 07.09.2023. godine na ime F. E., Zapisnik o izvršenoj radnji privremenog oduzimanja predmeta i popisu privremeno oduzetih predmeta PS Tešanj broj: ... od 07.09.2023. godine, Odobrenje Kantonalnog tužilaštva broj: T04 0 KTA ... 23 od 18.09.2023. godine, Naredba Kantonalnog tužilaštva broj: T04 0 KTA ... 23 od 18.09.2023. godine, Zapisnik o otvaranju i pregledu privremeno oduzetih predmeta i dokumentacije PS Tešanj broj: ... od 18.10.2023. godine, Fotodokumentacija PS Tešanj broj: ... od 07.09.2023. godine, Izvod iz kaznene evidencije PS Tešanj broj: ... od 31.10.2024. godine, Zapisnik o ispitivanju optuženog Fatić Elvedina PS Tešanj broj: ... od 07.09.2023. godine i Nalaz i mišljenje FUP Sarajevo Centar za forenzička ispitivanja, vještačenja i istraživanja Sarajevo broj: ...od 01.10.2024.godine.

Uvjerenje suda da je do priznanja krivnje došlo s razumijevanjem, te da je optuženi svjestan svih posljedica i obaveza koji proističu iz priznanja krivnje, te da postoji dovoljno dokaza o krivnji optuženog, pa je sud i prihvatio priznanje krivnje optuženog.

Iz naprijed navedenih dokaza a što je potvrđeno i priznanjem optuženog nesumnjivo proizilazi da je optuženi dana 09.09.2023.godine, na području općine Tešanj, neovlašteno posjedovao jedan bijeli pvc paketić sa sadržajem bijelo žute praškaste materije neto mase 0,183 grama, crnu pvc kutijicu sa pvc poklopcem u kojoj se nalazila prozirna pvc vrećica sa sadržajem bijelo žute praškaste materije neto mase 0,203 grama i komadić pvc vrećice i papirni paketić sa vidljivim tragovima bijelo žute praškaste materije, koju materiju je dobrovoljno predao ovlaštenim službenim licima PS Tešanj prilikom legitimacije u unutrašnjosti zgrade „Has komerc“ u ulici B.K., u mjestu J., za koju je vještačenjem utvrđeno da oduzeta materija sadrži psihoaktivnu komponentu „amfetamin“ koja opojna droga je pod rednim brojem 1, Liste opojnih droga iz Tabele 2 Liste psihotropnih tvari „Zabranjene tvari i biljke“, proglašena opojnom, a što proizilazi iz sljedećeg.

Iz Zapisnika o uviđaju PS Tešanj broj: ... od 07.09.2023. godine proizilazi da su policijski službenici PS Tešanj u prizemlju zgrade „Has Comerc“ u J. zatekli jedno muško lice kojeg su identifikovali kao F. E. sin V., rođen ... godine iz J., da su u skladu sa ovlaštenjima iz člana 25. Zakona o policijskim službenicima ZE-DO Kantona izvršili pregled istog, te da su u pretincu torbice marke „Nike“ pronašli materiju za koju se sumnja da se radi o opojnoj drogi i to: jednu pvc vrećicu prozirne boje kojoj se nalazila bijela materija koja svojim izgledom asocira na opojnu drogu „speed“ i jedna pvc bočica crne boje sa sadržajem jedne pvc vrećice prozirne boje sa zip zatvaračem umotane u pvc vrećicu prozirne boje u kojoj se nalazi bijela praškasta materija koja svojim izgledom asocira na opojnu drogu „speed“, jedna pvc vrećica sa tragovima bijele praškaste materije koja svojim izgledom asocira na opojnu drogu „speed“ i jedna pvc vrećica prozirne boje umotana u bijeli papir sa tragovima bijele praškaste materije koja svojim izgledom asocira na opojnu drogu „speed“, koje materije je optuženi dobrovoljno predao policijskim službenicima zašto mu je izdata Potvrda o privremenom oduzimanju predmeta broj: ... od 07.09.2023.godine i sačinjen Zapisnik o izvršenoj radnji privremenog oduzimanja predmeta i Popisu privremeno oduzetih predmeta broj: ... od 07.09.2023.godine. Lice mjesta je kriminalistički obrađeno a pronađeni i privremeno oduzeti predmeti su fotografisani o čemu je sačinjena Fotodokumentacija broj: ... od 15.04.2024.godine. Naredbom za hemijsko vještačenje Kantonalnog tužilaštva ZDK Zenica broj: T04 0 KTA ... 23 od 18.09.2023. godine, naređeno je vještačenje pronađenje biljne materije, te je Federalna uprava policiji dostavila Nalaz i mišljenje hemijskog vještačenja broj: ... od 01.10.2024.godine u kome je konstatovano da bijelo-žuta praškasta materija iz dostavljanja ambalaže u Nalazu navedeno pod tačkama 1 i 2a, kao i tragovi materije sa PVC i papirnog omota u Nalazu navedeno pod tačkom 2b sadrže psihotropnu komponentu „amfetamin“, koji se nalazi na Popisu opojnih droga psihotropnih tvari, biljaka iz kojih se može dobiti opojna droga i prekursor Zakona o sprečavanju i suzbijanju zloupotrebe opojnih droga („Sl. glasnik FBiH“ broj 08/06, 103/08 i 51/11).

Iz navedenog proizilazi da je optuženi suprotno odredbama člana 4. stav 2. i 3. i člana 19. Zakona o sprečavanju i suzbijanju opojnih droga u BiH kod sebe neovlašteno

posjedovao opojnu drogu, pa kako krivično djelo „Posjedovanje i omogućavanje uživanja opojnih droga“ iz člana 239. stav 3. KZ FBiH čini onaj ko neovlašteno posjeduje opojnu drogu, a uračunljivost optuženog nije ničim dovedena u pitanje, to se u radnjama optuženog stiču sva bitna obilježja krivičnog djela „Posjedovanje i omogućavanje uživanja opojnih droga“ iz člana 239. stav 3. KZ FBiH, te kako je optuženi bio svjestan svog djela i htjela njegovo izvršenje, to je sud optuženog oglasio krivim i osudio kao u izreci ove presude.

Prilikom odlučivanja o vrsti i visini krivično pravne sankcije, sud je cijenio na strani optuženog sve okolnosti koje su od značaja za odmjeravanje kazne. Od olakšavajućih okolnosti sud je našao da optuženi priznaje izvršenje djela koje mu se stavlja na teret, da se iskreno kaje, da se u međuvremenu zaposlio i obećao da se više neće ponoviti, a od otežavajućih okolnosti da je osuđivan, pa imajući u vidu navedene olakšavajuće i otežavajućih okolnosti sud je optuženom izrekao kaznu zatvora u trajanju od 3 (tri) mjeseca, smatrajući da je ova krivično pravna sankcija adekvatna težini krivičnog djela kao i ličnosti učinioca i da će se sa izrečenom kaznom postići opšta svrha kažnjavanja, kako sa aspekta generalne tako i specijalne prevencije.

U smislu odredbe člana 199. ZKP FBiH optuženi je obavezan da na ime troškova krivičnog postupka-paušala plati iznos od 30,00 KM u roku od 30 dana od dana pravosnažnosti presude.

Na osnovu odredbe člana 239 stav 4. KZ F BiH od optuženog F. E. **trajno se oduzima** ispitivani materijal neto težine 0,154 grama i 0,177 grama grama, a koji se nalazi deponovan u PS Tešanj i isti se ima uništiti u skladu sa odredbama člana 194. stav 3. ZKP FBiH.

Na osnovu svega navedenog sud je odlučio kao u izreci ove presude.

PRAVNA POUKA:

Protiv ove presude dozvoljena je žalba
Kantonálnom sudu Zenica u roku od 15
dana od dana prijema presude.

Sudija
Ajanović Besima